

Minister Presidente contento cu ayudo di Colonia Dominicano Aruba a logra cu exito forma un comunidad multicultural



DEN presencia di Gobernador, Fredis Refunjol, Secretario di

Estado Luis Sifres di Rep. Dominicana, Presidente di Parlamento di Aruba drs. Paul Croes, Parlamentario y Ministernan di pais Aruba, Consulado di Republica Dominicana na Aruba a realisa e acto ceremonial di prome piedra na unda ta bira Plaza Juan Duarte. E ta un honor n'e colonia Dominicano, cu a bin ta biba y traha na Aruba pa hopi aña caba.

E orador di honor e mainta aki riba e pleinchi dilanti hospital bieu, tabata Minister Presidente mr. Mike Eman.

"Nos ta celebra un momento special p'e comunidad Dominicano na Aruba ... Awe nos ta bay dedica un parti di tereno na Aruba, n'e lasonan di hopi tempo, di hopi fraternidad y solidaridad entre Rep. Dominicana y Aruba," e Prome Mandatario a inicia su discurso.

Despues el a repasa e historia di Juan Pablo Duarte, di kende nos ta siña e balor di bida di un homber y cu su trabou

no ta caba den e tempo di su bida.

Su idealismo y dedicacion ta transcuri pa un tempo despues di su bida. Su trabou ta keda un fuente di inspiracion. Un persona cu a haya su educacion na Europa y tabatin e oportunidad di keda aya pa desaroyo oportunidadnan sin limite.

"Pero Santo Domingo tabata yame; su amor pa su pais a pone cu el a crusa frontera y bolbe Rep. Dominicana. E tipo di dedicacion, sacrificio ora cu e tin otro oportunidadnan grandi, di tin un bida tranquil sin contratiempo y peligro, pero ta haci escogencia pa entrega su bida na desaroyo di su pais, t'e ehempel cu ta transcuri e tempo di bida di Juan Pablo Duarte," Prome Minister Eman a bisa esnan presente.

Premier Eman a elogiar Consul Rosario de Rosa, pa tur e esfuersonan cu el a haci pa

realisa e proyecto aki.

El a ilustra e comunidad multicultural di Aruba, cual ehempel a wordo duna durante bishita di La Reina cu show di e diferente comunidannan cu ta biba na Aruba. Tanto Princesa Maxima como Reina Beatrix tabata orguyoso di e comunidad. Aruba tambe, e ta bisa, ta orguyoso di ta un comunidad multicultural y e rikesa di e poblacion cu tin na Aruba. "Aruba a logra cu exito forma e comunidad multicultural yena di hende cu talento y inspiracion di trabou duro pa yuda forma e sociedad aki." El a referi na e situacion dificil cu Aruba ta pasando den e dianan aki y mas cu nunca Gobierno ta sinti e apoyo di e comunidad Latinoamericano y e tambe e solidaridad cu ta musta cu nan tey cu Aruba pa supera e situacion. "Esaki ta haci e diferencia di un bon sociedad y un sociedad unda no tin union.

